

**Been Im Ju Pa Koe Ka daux**

# Phuk Lai Sigang Khri



**Baux (6)**



# Khrawm Kaing Lai

Simin	Kaing Lai	Plah Lai
1.	Lox Tiag Tang Ceu .....	1
2.	Yesux Kieh Lazarux Deeh Kaoh Im Khaing Krax Yum.....	11
3.	Grawng Jah Lih Ceu Cao Ti Koe .....	21
4.	Petrux Mai Yohan Pai Pui Laux Caong Moi .....	33
5.	Philipux mai Pui Ethiopia .....	43

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft

Date: 29. 7. 2016

Kheu lai rieng pa plak plih pakpeung gumlox Siyiex in kieh aik o  
paox grawm mai ceu cao pa koe ka piang haktiex khawm uik  
mawh buanson, riang rao ka daux  
Yesux Khrit liak.

Translated from the English *Open Bible* Stories. Original work available at  
[unfoldingWord.org/stories](http://unfoldingWord.org/stories)

This work is licensed under the Creative Commons Attribution-  
NonCommercial-ShareAlike 4.0 International License. To view a copy of this  
license, visit <http://creativecommons.org/licenses/by-nc-sa/4.0/> or send a  
letter to Creative Commons, PO Box 1866, Mountain View, CA 94042, USA.

# Lox Tiag Tang Ceu Pa Gau Yesux



Mathiex 13:31–33, 44–46, Makux 4:30–32, Lukax 13:18, 18:9–14





Yesux paoh plih pui yaox lox tiag pa shiang mai meung raoma. Nawh Cao ah nin, “Meung raoma awm simie taux klaox pa rhuat pui tix kaux ka daux ma tix heue. Simie taux klaox mawh pa iak khaing paox tix daux simie ku ceu heue.



Khaix hoik ting, nawh lheu ting khaing num rib riem mai lih mawh gawng, tom sim raoma khankix hoek yuh mheem mai hoek laux piang kak nawh heue.”



Nawh Cao baux krai kix mhong lox tiag tang ceu, “Meung raoma awm susaix, pa teei bun tix kaux klu klao ka daux phawng gaox loe diag tom hoik laig susaix an ka daux khawm uik mai kieh ploheue.




Meung raoma awm sinngao pa ngawh pa hoik mox ka daux ma mai pui tix kaux yaox sinngao an mai baux mox kah, khaix an ka daux pa gaux rhawm, nawh hu coh pa koe tix khawm uik mai liag ma an heue.





Meung rao ma baow awm pui yuh lai tix kaux pa sawg shiang ceu pa koe dauw jawx pa mhawm khankix. Khaix hoik yaow nawh shiang an pa kied ngawh, nawh hu mai coh pa koe tix khawm uik mai liag shiang an heue.”




Nawh Cao baow krai lox tiag ka pui pa een rhawm ka Tokauxtix, grawng uik rah see tix mai nieb een tang kaux ang koe ceu, “Pui ra kaux haok dauw nyiex buan, son sang rawg buan. Tix kaux mawh Pharishie mai tang kaux an mawh pui pa koh mau heue.



Pharishie an rawg buan yuh nin, “Siyiex eue, aux yaogyaw buanson Maix, kheu ang aux awm pui tang kaux pa nieb rhim ti teei, pa yuh pa ang rah see, pa lud vao mai kheu ang aux awm pui koh mau in heue.



Aux tuah pa ih tix tuah ra ngaix mai aux tawx kao son tix son khaing pa pon aux khawm uik heue.”



Viang mawh nan pui pa koh mau an, cung dee singai mai pie ngai nawh ang yaog ti maong plak raoma, nawh dieh naok tix ah nin, “Siyiex eue, chaox rhawm ka aux pa mawh pui ting map liak.”



Aux krai ka pex, yam lih hu pui in ka nyiex tix, nawh hoik nie lheu pon pa rah see khaing tang kaux an heue. Mawh kheu pui mawx ang ah, pa yaog tokaux tix lhaong, tag sang yeen nawh tiem, pui mawx ang ah, pa yuh tokaux tix tiem, tag sang yaog nawh lhaong.”

### **K. Deeh Thawk Theng Ka Been**

1. Yesux tiag ti kraikrawng meung raoma awm ceu pa tix?
2. Yesux tiag ti kraikrawng meung raoma ka simie taux klaox mai susaix yuh ka mawx?
3. Yesux tiag ti kraikrawng meung raoma ka sinngao pa ngawh pa hoik mox ka dau ma mai shiang ceu pa koe dau jawx yuh ka mawx?
4. Pharishie mai pui pa koh mau rawg buan yuh ka mawx ?
5. Yesux ah mawh pui mawx pa nie lheu pon pa rah see? Kheu pa tix?

### **Kh. Krax Pa Doh Rhawm Ka Been**

1. Meung raoma mawh pa yuh ka mawx?
2. Grawng simie taux klaox mai grawng susaix koe dee bleeh yuh ka mawx?
3. Grawng sinngao pa ngawh pa hoik mox ka dau ma mai shiang ceu pa koe dau jawx koe dee bleeh yuh ka mawx?
4. Rhawm rhi pharishie mai rhawm rhi pui pa koh mau tang siyox yuh ka mawx?

### **G. Krax Pa Deeh Shiao Daux Ju Tix Khaing Been**

1. Son sang vieh va meung Siyiex, maix pon joh jhan yuh ka mawx?
2. Kheu pui pa koh mau viex rhawm tiem tix hoek sivoengai Siyiex, pon krax pluat ploi phimap. Maix sang greed dex sivoengai Siyiex ka dau rhawm rhi pa yuh ka mawx?

## Ng. Ceu Pa Rieb Gau Ex Khaing Been In

1. Meung raoma mawh dah dee pa kuang jhawp (up peung) Siyiex heue. Awm an rhawm rhi pui pa rieb ka krax pa kuang jhawp Siyiex kawx mawh meung raoma heue.
2. Meung raoma, yam jah viang iak awm simie taux klaox kawx, chix ting lhaong haok huan hu sipie sipie.
3. Pui pa tawng ka ngawh jum krax taoh pa pon laig daux meung raoma, lheu khaing grawng meung raoma, nawh ang lai een ceu pa koe piang haktiex ting ceu tix ceu kawx heue.
4. Phimap pa ang Siyiex chix pluat ploi ang koe. Phan ex hoek sivoe ngai Siyiex mai rhawm tiem pa doh keud ka phimap tix, Siyiex tag sang pluat ploi phimap ex khawm uik.


## P. Baux Lai Pa Caw Tix Ci

*Lai Lukax 17:21*

*Viang mawh nan kawx kix tag ang ah, “jhak heue, koe tin, phan ang mawh nan jak heue, koe tan. Mawh kheu Meung Siyiex koe ka daux pex heue”.*




# Yesux Kieh Lazarux Deeh Kaoh Im Khaing Krax Yum




Yohan – 11:1-46







Tix singaix Yesux mhong grawng kin saux Lazarux. Lazarux mawh prie Mathax mai Marix pa mawh paox meed pa mhawm pa tawng mai Yesux. Yam mhong Yesux grawng in kix, Nawh Cao ah yuh nin, “Jhawm saux an ang mawh jhawm saux tom yum, mawh jhawm saux son sang sidawng min plak ngai Siyiex heue.” Yesux kied moh ka Lazarux mai nan nawh pa mawh Mathax mai Marix. Khaix hoik mhong Nawh grawng saux Lazarux, Nawh Cao baux ot dee an ra singaix.




Khaix an Nawh ah nin ka kawncau Nawh khankix, “Ex deeh hu daux meung Yudax tix bawg.” kawncau Nawh khankix deeh ah nin ka Nawh, “Pui Yudax khankix sawg ti dheem Maix ka simaox, Maix sang baux deeh hu tan tix bawg lie?” Yesux deeh pawk lox ah nin, “Paox grawm ex Lazarux hoik laig it, Aux sang hu so nawh siduad khaing pa it nawh heue.”




Yesux hoik krai grawng pa hoik yum Lazarux, viang mawh nan kix ce nawh krai grawng laux lee ti it khaing. Kheu an Yesux tom krai sidawng ka kix, “Lazarux hoik yum, Aux gaux rhawm son pex kheu ang Aux ot tan, pex tag sang yum rhawm kah, Ex hu ka nawh heue.”




Yam hoek Yesux tan, kix sipaung Lazarux daux simeeig hoik koe pon singaix heue. Mathax mai Marix hu rieb ka Nawh Cao. Mathax ah nin ka Yesux, “Simiang eue, phan Maix ot tin prie aux tag ang yum. Pie yam in kawx, aux tawng phan Maix rawg ka Siyiex ceu pa tix ang ah, Siyiex tag tawx ka Maix heue.”




Yesux deeh ah nin ka nawh, “Aux mawh ceu pa deeh kaoh im ju heue. Pui mawx pa yum rhawm ka Aux, viang nawh hoik yum kawx tag sang im heue. Pui pa kawm im ku kaux, pa yum rhawm ka Aux, tag ang yum tix bawg kawx. Yum rhawm maix ka lox in lie?” Nawh deeh ah nin ka Yesux, “Mawh heue, aux hoik yum rhawm grawng mawh Maix Cao Khrit Kawn Siyiex, Kaw pa hoek piang hakteix in heue.”




Khaix an Marix kawx hoek ka Yesux mai krub dex caong Nawh Cao ah nin, “Simiang eue, phan Maix ot tin prie aux tag ang yum.” Yesux chawk ah nin, “Pex sipaung Lazarux dee mawx?” Kix deeh pawk ah nin, “Simiang eue, hoek ti jhak heue.” Khaix an Yesux yiem heue.



Kix hoik thox daux simeeig rang ka simaox. Yesux ah nin, “Greed simaox an heue.” Mathax ah nin, “Simiang eue, yam in nawh tee hoik cux si-um, kheu nawh yum hoik koe pon singaix.”




Yesux ah nin ka nawh, “Aux hoik krai phan maix yum rhawm maix tag yaox min plak ngaix Siyiex ang mawh lie?” Kix greed ka simaox an heue.



Yesux maong mai ah nin, “Keeing eue, Aux yaogyaw buanson Maix, kheu hoik nghiit Maix lox Aux. Aux tawng grawng nghiit Maix lox Aux jheeng jheeng. Viang yuh ka mawx kawx son sang yum rhawm pui pa cung sivie tin, grawng pa ploi Maix Aux hoek, Aux tom ah nin.” Khaix ah Nawh nan, Nawh Cao yo lox ting sinum ah nin, “ Lazarux eue, lih hoek heue.”



Lazarux, kaw pa hoik yum lih hoek. Taix caong nawh hoik pua ka man simeeig mai pak ngai nawh hoik vien ka man. Yesux ah nin ka kix, “Yah ti ploi nawh heue.” Pui ceu Yudax tom nie yum rhawm ka Yesux, kheu hoik yaox kix mhai pa daox deng pa yuh Nawh Cao heue.



Viang mawh nan, Pharishie khankix song rhawm ka Yesux mai kix kah kum grawng sang pah ka Yesux mai Lazarux heue.

### **K. Deeh Thawk Theng Ka Been**

1. Yam mhong Yesux grawng saux Lazarux, Nawh ah mawh yuh ka mawx? Lazarux mawh pui pa yuh ka mawx?
2. Yesux mai kawncau Nawh khankix ah grawng Lazarux yuh ka mawx?
3. Mathax ah yuh ka mawx ka Yesux mai Yesux deeh pawk lox nawh yuh ka mawx?
4. Yam nhie Yesux kix greed simaox thox daux simeeig rang, Mathax ah yuh ka mawx? Nawh Cao deeh pawk lox yuh ka mawx?
5. Yesux rawg buan yuh ka mawx?
6. Khaix hoik kaoh im Lazarux, Yesux nhie kix yuh pa tix mai pui ceu Yudax khankix lih ti mawh yuh ka mawx?

### **Kh. Krax Pa Doh Rhawm Ka Been**

1. Maix yaox Yesux mawh pui pa yuh ka mawx ka daux been in?
2. Kheu pa tix Yesux ah, “Jhawm saux an ang mawh jhawm saux tom yum, mawh jhawm saux son sang sidawng min plak ngai Siyiex heue.”?
3. Maix yaox yuh ka mawx grawh grawng kaoh im Lazarux?

### **G. Krax Pa Deeh Shiao Daux Ju Tix Khaing Been**

1. Yam yaox maix krax saux nyia, been in kieh maix koe riang rao yuh ka mawx?
2. Viang Yesux tawng pui Yudax sang dheem Tix ka simaox kawx, Nawh Cao hu ka meung Yudax son sang sidawng min plak ngai Siyiex. Son sang sidawng min plak ngai Siyiex, maix khaw ti im ju yuh ka mawx?

## Ng. Ceu Pa Rieb Gau Ex Khaing Been In

1. Yesux mawh Siyiex pa pex ka krax yum.
2. Yesux koe krax pa chaox rhawm ka pui pa khi rhawm khankix.
3. Ceu pa sipub ex ku ceu khawm uik mawh son sang sidawng min plak ngai Siyiex.


## P. Baux Lai Pa Caw Tix Ci

*Lai Yohan 11:25*

*Yesux baoux ah nin ka nawh, "Aux mawh ceu pa deeh kaoh im ju heue. Pui pa yum rhawm ka Aux viang nawh hoik yum kawx tag sang im heue."*



# Grawng Jah Lih Ceu Cao Ti Koe




Lai Kawncau – 2






Khaix hoik haok Yesux piang meung raoma, kawncau Nawh khankix ot daux veng Yerusaliem, awm lox pa tawm Nawh Cao. Kix khrawm paox tix mai rawg buan ang jud ang jai heue.




Bawg yam an mawh ngaix poi Pientekote heue. Poi Pientekote mawh poi yaog yaw buanson Siyiex. Pui ceu Yudax pa ot ku dah ku dee, hoek ti khrawm paox tix daux veng Yerusaliem mai kix laig daux poi an heue.




Pui pa yum rhawm ka Yesux khankix, khrawm paox tix daux nyiex tix mu, dom mawx dom an lox lih hoek khaiing raoma awm lox phlu bhaung ting mai naog daux nyiex khawm uik. Kix yaox bleeh dak kukak khankix pa awm ngu mai tum piang kix ku kaux. Kix khawm uik naog mai Khuan Singax Singeh mai jah ti sikah ka daux lox tang ceu khankix awm pa tawx Khuan kix ah heue.



Yam mhong lox an, pui pa ot daux veng Yerusalieim khawm uik, khrawm paox tix hoek ka nyiex an heue. Pui hun khawm uik daox deng ka lox sikah kawncaw khankix daux lox pui ceu kix, mai kix khawm uik yaog yaw ka kaing pa daox deng pa yuh Siyiex.




Tang kaux ti blah nieb ah, “Kix sak kix yoek ka rawm plix siiet pa tie heue.” Yam an Petrux kaoh cung mai ah nin, “Kix yoek awm pa ce pex ang mawh. Ceu pa yaox pex in kix, mawh mhai rug pa grum naog awm pa krai daux Phuk lai Sigang Khri, “Aux tag sang ploi Khuan Singax Singeh daux singaix sidah heue.”




Petrux baoh ah nin, “Puxaik khankix eue, Pex hoik sax yaox ka pa yuh Nawh Cao ceu pa daox deng, ka daux sibrawm Siyiex. Viang mawh nan pex hoik pah Nawh Cao yum piang khaox lhak.




Viang kawx Siyiex hoik tawx Nawh Cao kaoh im khaing krax yum, son sang grum naog awm pa koe lox jhai khankix. Yix mawh pui pa kham mhai rug ka grawng in, pa hoik yaox yix ka ngai tix heue.



Siyiex kieh Yesux ngawm plak khawm dawm mai yaog Nawh ting piang khawm uik heue. Grawng pa yaox pex mai pa mhong pex yam in kix, mawh awm lox sijax mukheu pa hoik tawx Siyiex, Nawh Cao ploi Khuan Singax Singeh ka piang ex khawm uik heue.”



Siyiex kieh Yesux mawh Cao Taoh son kawn pui khawm uik, pa mawh Kaw pa hoik pah pex yum piang khaox lhak heue.”



Yam mhong lox sidiex Petru, pui hun khawm uik kied koe krax khi rhawm mai chawk ka nawh ah nin, “ Phan mawh nan, ex caw ti yuh pa tix?”




Petrux pawk lox ah nin, “ Doh keud ka phimap pa yuh tix, mai cubcom ka daux ceu kaux Yesux Khrit. Siyiex tag ploi phimap pa yuh pex mai sang ploi Khuan Singax Singeh hoek ka piang pex heue.



Khaix an, pui pa mhong ka lox sidiex Petrux mai yum rhawm ka Yesux mai kix kham krax cobcom, koe been loe rheng haoh heue. Jah yam an kix khawm uik laig carang pui cie Siyiex, pa kok mawh ceu cao heue.





Pui pa yum rhawm khawm uik, nghiit ka lox sidiex kawncaw khankix. Mai kix yuh paox yuh pie tau, ih priex tau mai rawg baun tau heue. Kix khrawm paox tix mai goih ceu pa koe tix, ka tix kaux lai tix kaux. Yaog yaw ka Siyiex mai pui pa ang mawh kawn khrit khankix kawx, nab yam ka kix heue.

### **K. Deeh Thawk Theng Ka Been**

1. Khaix hoik haok Yesux piang meung raoma, kawnceu Nawh khankix yuh pa tix?
2. Khuan Singax Singeh lih koe ka piang kix yuh ka mawx?
3. Pui pa ot daux veng Yerusaliem yuh pa tix mai ah pa tix?
4. Petrux deeh krai kix mhong yuh ka mawx?
5. Son sang hoek krax taoh, Pretrux nhie kix yuh ka mawx?
6. Pui pa yum rhawm khan kix khrawm paox tix yuh pa tix?

### **Kh. Krax Pa Doh Rhawm Ka Been**

1. Kheu pa tix Yesux nhie kawnceu kix pau kadaux veng Yerusaliem?
2. Khuan Singax Singeh ah ex mawh pa yuh ka mawx?
3. Maix yaox rhawm rhi pui pa yum rhawm khankix yuh ka mawx ka daux been in?
4. Ceu cao ah ex mawh pa yuh ka mawx?

### **G. Krax Pa Deeh Shiao Daux Ju Tix Khaing Been**

1. Khaix hoik pon kawnceu khankix Khuan Singax Singeh kix lih tix mawh pui pa kham mhai rug grawng Yesux mawh Cao Taoh. Son sang pon maix siawp sibrawm Khuan Singax Singeh, maix caw ti yuh pa tix?
2. Kadaux in singaix, ceu cao ex caw ti im ju yuh ka mawx son sang awm krax pa im ju pui pa yum rhawm pa koe daux been in?
3. Khaix hoik rieb ex Yesux mawh Cao Taoh tix, ex lih ti im ju yuh ka mawx mai koe beeh glawm pa tix?

## **Ng. Ceu Pa Rieb Gau Ex Khaing Been In**

1. Phan ex pon siawp sibrawm Khuan Singax Singeh, ex tag mawh pui pa pon kham mhai rug grawng Yesux mawh Cao Taoh.
2. Dee bleeh ceu cao mawh “Pui cie Siyiex”, “Cub pui pa yaox ti kham krax pa kok Siyiex” mai “Tokaux Yesux”

## **P. Baux Lai Pa Caw Tix Ci**

Lai Kawncaw 1:8 Viang mawh nan pex tag sang pon sibrawm, yam hoik hoek Khuan Singax Singeh piang pex mai pex tag sang mawh pui pa kham mhai rug son Aux, jah ka veng Yerusaliem khawm meung Yudax khawm uik mai meung Samarix mai hoek tom dee sidah haktiex heue.




# Petrux Mai Yohan

## Pai Pui Laux Caong Moi



Lai Kawncau – 3:1–4:22





Tix singaix Petrux mai Yohan haok hu ka nyiex buan. Yam hu kiex krax, kiex yaox pui laux caong daux krax hu nyiex buan heue.



Petrux jawg ti jeung ngai tix piang kaw an mai ah nin, “ Aux ang koe mau khri. Viang mawh nan pa koe aux, aux sang tawx ka maix heue. Ka daux ceu kaux Yesux Khrit Pui veng Nazariet, kaoh hu ka caong tix heue.”



Dom mawx dom an Siyiex kieh kaw an moi heue. Nawh hu ka caong tix, jaloh tix mai yaog yaw ka Siyiex. Pui pa ot daux nyiex buan khawm uik daox deng ka ceu pa hoik mawh ka nawh heue.



Pui khawm uik kied daox deng kah mai to hu ka Petru. Petru deeh ah nin ka kix, “Pex lai daox deng ka pui in yuh ka mawx? Pex lai jawg ti jeung ngai pex ka yiex, awm pa hoik mawh sibrawm mai pa rah see yiex. Pa hoik kieh nawh dee chix hu ka caong tix, mawh krax yum rhawm ka daux ceu kaux Yesux Khrit heue.






Pex hoik teei Cao Khrit pa im yum, viang mawh nan Siyiex hoik kieh Nawh kaoh im khaing krax yum. Ceu in kix mawh mhai sakse pa grum naog, pa grux jhi Siyiex ka jheeh cao jhai khankix, grawng Khrit tag sang kham geu. Mawh kheu nan doh keud ka phimap tix mai deeh tieh tix plak Siyiex heue. Siyiex tag sang ploi phimap pa yuh pex khawm uik heue.”



Yam mhong lox sidiex Petrux mai Yohan, cao giex kaing nyiex buan khankix kied sung sang rhawm kah. Mawh kheu nan, kix giex ka Petrux mai Yohan mai sau daux thawng heue. Viang mawh nan, pui pa mhong lox sidiex kiex mai yum rhawm kah, khawm simex, bun mai kawn nyawm khawm uik koe been phuan rheng haoh heue.



Ngaix khaix, cao kaing pui Yudax khankix viex kiex hu ka nyiex cao giex kaing li pa ting heue. Mai kix chawk ka kiex ah nin, “Pex yuh ceu in kix ka daux sibrawm pa yuh ka mawx?”



Petrux pawk lox ah nin, “Kaw pa laux caong an moi, kheu ka daux ceu kaux Yesux Khrit, Pui veng Nazariet. Pex hoik pah Nawh yum piang khaox lhak. Viang mawh nan Siyiex kieh Nawh deeh kaoh im khaing krax yum. Pex hoik thiang ti tik ka Nawh Cao. Ang koe ceu pa taoh ka daux tang kaux tix kaux kawx, mawh kheu ang koe ceu kaux tang kaux greem raoma, pa hoik tawx ka sinax kawn pui, ka daux dee sang hoek ex krax taoh.”



Yam yaox kix grawng ceu pa kua rhawm Petrux mai Yohan mai tawng grawng kiex ang tie tawng lai mai mawh pui pheem, kix daox deng kah mai kix doh rhawm ka grawng mawh kiex pa hoik ot tau mai Yesux heue. Kix kok ka Petrux mai Yohan, mai kix tawm lox mai ploi kiex hu heue.

### **K. Deeh Thawk Theng Ka Been**

1. Petrux mai Yohan yaox pui mawx ka daux krax hu nyiex buan mai ah pa tix ka kaw an?
2. Kheu pa tix pui pa ot daux nyiex buan khankix dao deng?
3. Mawh kheu jao pa tix cao giex kaing nyiex buan sung sang rhawm mai giex Petrux mai Yohan sau ka daux thawng?
4. Yam chawk cao giex kaing li ka grawng pex pai pui laux caong moi, kiex deeh pawk yuh ka mawx?
5. Kheu pa tix cao giex kaing li khankix dao deng ka Petrux mai Yohan?

### **Kh. Krax Pa Doh Rhawm Ka Been**

1. Maix yaox Petrux mai Yohan mawh pui pa yuh ka mawx ka daux been in?
2. Maix yaox yuh ka mawx ka grawng sung sang rhawm cao giex kaing nyiex buan ka lox sidiex Petrux mai Yohan?

### **G. Krax Pa Deeh Shiao Daux Ju Tix Khaing Been**

1. Viang Petrux mai Yohan ang pon tawx mau khri ka kaw pa laux caong kawx kiex hoik pon teem kaw an ka daux ceu pa chix pa pon yuh tix heue. Maix pon tawx ceu pa tix ka pui tang kaux pa lo ka krax teem?
2. Yam hoik moi caong kaw an, nawh gaux rhawm jaloh tix yaog yaw ka Siyiex. Maix sang yaog yaw ka buanson Siyiex yuh ka mawx ka daux ju maix?
3. Petrux mai Yohan kham mhai rug grawng Yesux ka daux pa kua rhawm rhi tix heue. Maix sang pon kham mhai rug grawng Yesux yuh ka mawx ka sivie siveng dee ot maix?

## **Ng. Ceu Pa Rieb Gau Ex Khaing Been In**

1. Phan ex yum rhawm ka daux ceu kaux Yesux, ex pex yuh ku ceu son sang lih min plak ngai Siyiex.
2. Caw ti viex rhawm rhi tix yaog yaw ka buanson Siyiex ka daux pa ang kaig tua heue.
3. Ka daux kaing pa yuh ex khawm uik, ex caw ti tawx min plakngai ka Siyiex awm Petrux mai Yohan heue.

## **P. Baux Lai Pa Caw Tix Ci**

Lai Yohan 14:13 Mai pex sang rawg sang mhaing ceu pa tix ang ah ka daux ceu kaux Aux, Aux tag sang yuh heue. Yuh ka mawx son sang koe min plak ngai Keeing Cao ka daux Kawn Cao heue.




# Philipux Mai Pui Ethiopia



Lai Kawncau 8:26-40









Tix singaix kawncaw Siyiex hoek ka Philipux mai cau nawh hu ka krax hu veng Gaza. Yam hu nawh, nawh yax ka pui Ethiopia tix kaux, pa mawh pui ting sibrawm, ngawm dauh ling brung cie tix. Khuan Cao nhie Philipux hu sikah mai nawh heue.



Yam Philipux hu dex ling brung an, nawh mhong kaw an phat lai cao jhai Isayax. Phuk lai Sigang Khri pa phat nawh mawh nin, “Hoik tok Nawh hu awm yung pa sang pah yuh heue. Mai kawm yung ang nye ka sivoe cao rhip hauk. Ka dauh krax tiem rhawm rhi Nawh, rud ti teei pa prawng pa ca, ceu pa mawh pa meh khaing Nawh heue. Mawh mawx pa sang krai grawh grawng ju Nawh? Mawh kheu hoik teei ju Nawh khaing haktiex heue.”




Philipux chawk ka nawh, “Maix tawng dee bleeh pa phat maix lie?” Kaw an deeh ah nin, “Ang tawng dee bleeh heue. Cao jhai in krai gawng pui mawx? Krai gawng tokaux tix lie, phan ang mawh nan, krai gawng tang kaux lie?”



Yam an Philipux krai nawh mhong gawng lai pa phat nawh mawh gawng Yesux. Mai nawh baox krai nawh mhong gawng Yesux pa koe daux Phuk Lai Sigang Khri tang dah, mai Nawh krai lox buan gaux rhawm gaux rhi ka kaw an heue.



Yam hoek kix ka dee koe rawm tix dah, kieh ling brung an kaog mai ah nin ka Philipux, “Tawx krax cubcom ka aux liak, aux yum rhawm grawng Yesux Khrit mawh Kawn Siyiex.”



Kiex ra kaux lih hu ka dau rawm, mai Philipux cubcom ka kaw an. Yam hoik cubcom, Khuan Singax loe Philipux hu tang dah, son sang sidiex gau lox buan gaux rhawm gaux rhi.



Pui Ethiopia an kawx, gaux rhawm gaux rhi mai hu krax hu tix heue.

### **K. Deeh Thawk Theng Ka Been**

1. Kawncau Siyiex nhie Philipux hu dee mawx mai nawh yaox ka pui mawx?
2. Yam Philipux hu dex ling brung an, nawh mhong pui Ethiopia phat lai grawng ceu pa tix?
3. Yam Philipux chawk grawng lai pa phat nawh, nawh pawk yuh ka mawx?
4. Philipux krai grawng dee bleeh lai pa phat pui Ethiopia yuh ka mawx?
5. Yam hoek dee koe rawm, kiex yuh pa tix?
6. Khaix hoik cubcom Khuan Singax Singeh yuh pa tix ka Philipux ?

### **Kh. Krax Pa Doh Rhawm Ka Been**

1. Pui Ethiopia ang tawng dee bleeh lai pa phat tix kawx, mawh kheu pa tix nawh phat ka Lai Sigang Khri an?
2. Gumlox “Cubcom” ah ex koe dee bleeh yuh ka mawx?

### **G. Krax Pa Deeh Shiao Daux Ju Tix Khaing Been**

1. Pui Ethiopia phat Lai Sigang Khri ka daux pa cai rhawm cai rhi ka gumlox Siyiex. Maix phat Lai Sigang Khri yuh ka mawx?
2. Phuk Lai Sigang Khri koe buanson yuh ka mawx ka daux ju maix?
3. Maix sang yuh lox buan yuh ka mawx ka pui pa cai rhawm ka gumlox Siyiex?

## **Ng. Ceu Pa Rieb Gau Ex Khaing Been In**

1. Siyiex tawng ka rhawm rhi pui pa cai rhawm ka gumlox Nawh.
2. Phan Khuan Singax ang paoh ngai plak khuan ex, rhawm rhi plak khuan ex, dong gua plak khuan ex, ang chix tawng, ang chix yaox ka dee bleeh gumlox pa raux cie Siyiex heue.
3. Ex pui pa yum rhawm ku kaux caw ti pon krai pui tang kaux mhong krax taoh Yesux.

## **P. Baux Lai Pa Caw Tix Ci**

*Lai Yaogyaw 119:18*

*Mai paoh ngai aux son sang chix yaox aux ka ceu pa daox pa am ka daux been li Maix heue.*



